

Мархабо Рамазон

00:00 / 14.01.2017 3887

Яратганда Еру Осмонни Раҳмон.
Ой ила Қуёшга манзил бичган он.
Ойларни ўн икки айлаган замон.
Сени улар ичра айламиш султон.
Мархабо, хуш келдинг, хушвақт Рамазон.

Сен ўзинг халқларга бўлдинг қутлуғ ой.
Сендадир чин севги, ҳақийқий чирой.
Ҳар неки фазийлат топмиш сендан жой.
Сен билан фахр этар ҳатто кўкда Ой.
Мархабо, хуш келдинг, хушвақт Рамазон.

Роббим бағринг ичра яширмиш бир тун.
Унда халқ тақдирин битармиш бутун.
Уммат умри ажри бўлсин деб бутун,
Айламиш бу тунни минг ойдан афзун.
Мархабо, хуш келдинг, хушвақт Рамазон.

Шу кечангда олмиш Фурқон осмоним.
Шу кечанг тушмиш ер узра Қуръоним.
Жибрилу малаклар бўлар меҳмоним.
Мақбулдир дуойим, қолмас армоним.
Мархабо, хуш келдинг, хушвақт Рамазон..

Жаннат эшиклари очилар сенда.
Дўзах эшиклари ёпилар сенда.
Шайтонлар занжирбанд этилар сенда.
Нафслар улардан қутулар сенда.
Мархабо, хуш келдинг, хушвақт Рамазон..

Эсингдами, Расул сени кутарди,
Сен келсанг, умматин табрик этарди,
Севинчдан гоҳ кулар, гоҳо йиғларди,
Фазлинг деб, барчага сени мақтарди.

Мархабо, хуш келдинг, хушвақт Рамазон.

Жибрил келиб сенда Расул қошига,
Шерик бўлиб башар хизматдошига,
Сингдириб Қуръонни ичу тошига,
Хатм қилдирарди ул сирдошига.
Мархабо, хуш келдинг, хушвақт Рамазон.

Гар билсанг, ўшанда Ҳабиб Мустафо,
Саховат бобида эрди гар якто,
Шавқингдан сарф этиб не бор муҳайё,
Шамолдек эсарди этганда сахо.
Мархабо, хуш келдинг, хушвақт Рамазон.

Сен сабаб қўл тортиб аҳлу аёлдан.
Сени деб кечарди неча ҳалолдан.
Масжидга уй тикиб хурмою толдан,
Фазлин сўрар эрди У Зулжалолдан.
Мархабо, хуш келдинг, хушвақт Рамазон.

Санокли кунларинг топиб ниҳоя,
Ҳилолингга завол солганда соя,
Набий маҳзунлиги билмасди ғоя,
Дер эрди иймондан буни киноя.
Мархабо, хуш келдинг, хушвақт Рамазон.

Биз эса умматмиз, бил, ўша зотга.
У каби боқармиз биз ҳам ҳаётга.
Унинг йўли бизни элтар нажотга.
Ўргатмиш сен билан бизни саботга.
Мархабо, хуш келдинг, хушвақт Рамазон.

У зот каби биз ҳам сени севармиз.
Доимо бўйингга муштоқ турармиз.
Қудумингдан шоду хуррам бўлармиз.
Фироқингдан онча маҳзун ёнармиз.
Мархабо, хуш келдинг, хушвақт Рамазон.

Жўш урар Раҳмоннинг раҳмати сенда.

Мавж урар мағфират дарёси сенда.
Ювилиб умматнинг исёни сенда,
Дўзахдан қутулиш имкони сенда.
Марҳабо, хуш келдинг, хушвақт Рамазон.

Сен билан соғ эрур жисму жонимиз.
Сен билан софланар танда қонимиз.
Сен билан покланар бу виждонимиз.
Сен билан нурланар ҳам иймонимиз.
Марҳабо, хуш келдинг, хушвақт Рамазон.

Битмагай бир умр васфинг айласам.
Сийратинг ёзмоққа ожиздир қалам.
Шавкатинг олдида қилиб қаддим ҳам,
Лойиқдир таъзим-ла туну кун десам:
Марҳабо, хуш келдинг, хушвақт Рамазон.

Ҳасанхон Яҳё Абдулмажид
2011/08/05